

## PRIJEDLOG

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine na \_\_\_\_\_ sjednici Predstavničkog doma, održanoj \_\_\_\_\_ 2008. godine i na \_\_\_\_\_ sjednici Doma naroda, održanoj \_\_\_\_\_ 2008. godine, usvojila je

### **Z A K O N** **o dopunama Zakona o izmirenju obaveza** **po osnovu računa stare devizne štednje**

#### Član 1.

U Zakonu o izmirenju obaveza po osnovu računa stare devizne štednje («Službeni glasnik BiH», br. 28/06, 76/06 i 72/07), iza DIJELA TREĆEG EMISIJA OBVEZNICA, dodaje se «DIO TREĆI A – NAKNADNA VERIFIKACIJA» koji glasi:

«DIO TREĆI A – NAKNADNA VERIFIKACIJA

#### Član 23a.

##### **(Rokovi za naknadnu verifikaciju)**

- (1) Utvrđuje se rok za naknadno podnošenje zahtjeva za verifikaciju u trajanju od dva mjeseca od dana stupanja na snagu ovog Zakona, a Agencije su dužne okončati postupak po podnesenim zahtjevima u roku od pet mjeseci od dana stupanja na snagu ovog Zakona.
- (2) Izuzetno od stava (1) ovog člana, entiteti i Distrikt mogu, u skladu sa dostignutim stepenom verifikacije, propisati i nove dodatne rokove za podnošenje zahtjeva za verifikaciju u trajanju od najmanje dva mjeseca godišnje, s tim da postupak verifikacije mora završiti do 31.12.2010. godine.

#### Član 23b.

##### **(Gotovinska isplata)**

U roku od dva mjeseca nakon provedenog postupka verifikacije, svakom pojedinom potražiocu isplatit će se iznos od 1.000 KM ili razlika do 1000 KM u odnosu na ranije isplate ili ukupan verificirani iznos potraživanja do 1.000 KM.

Član 23c.  
**(Izmirenje putem obveznica)**

Obaveze po osnovu stare devizne štednje koje su naknadno verificirane, a nisu isplaćene u gotovini, izmiruju se putem obveznica pod uslovima propisanim ovim Zakonom, a koje će se emitirati najkasnije do 31. matra naredne godine u odnosu na godinu u kojoj je izvršena verifikacija.»

Član 2.

U članu 27. iza riječi: «dužni dostaviti» dodaju se riječi: «na izvršenje».

Iza stava (1) dodaje se stav (2) koji glasi:

« (2) Presude iz stava (1) ovog člana entitetskom ministarstvu finansija, odnosno Direkciji za finansije Distrikta mogu dostaviti i povjerioci stare devizne štednje.»

Član 3.

Ovaj Zakon stupa na snagu narednog dana od dana objavljivanja u «Službenom glasniku BiH».

PS BiH broj               /08  
                                  2008.godine  
Sarajevo

Pedsjedavajući  
Predstavničkog doma  
Parlamentarne skupštine BiH

**dr. Milorad Živković**

Pedsjedavajući  
Doma naroda  
Parlamentarne skupštine BiH

**Sulejman Tihić**

## **O R A Z L O Ź E N J E**

### **I - Ustavni osnov**

Ustavni osnov za donošenje Zakona o dopunama Zakona o izmirenju obaveza po osnovu računa stare devizne štednje sadržan je u sljedećim odredbama Ustava Bosne i Hercegovine:

- U članu I 1. prema kojem, između ostalog, Bosna i Hercegovina nastavlja svoje pravno postojanje po međunarodnom pravu, a shodno odredbama Aneksa II 2. osigurava se kontinuitet pravnih propisa;
- U članu I 4. u pogledu slobodnog kretanja kapitala i jedinstva tržišta;
- U članu II 1. prema kojem se, između ostalog, obezbjeđuje najveći nivo međunarodno priznatih ljudskih prava i osnovnih sloboda, kao i u tač. 6. istog člana u vezi implementacije tih prava, što uključuje i Evropsku konvenciju o zaštiti ljudskih prava i osnovnih sloboda, sa njenim protokolima koji se direktno primjenjuju u BiH;
- U članu III 1. d) prema kojem je BiH odgovorna za monetarnu politiku, a u vezi sa članom VII;
- U članu III 1. e) kojim je propisana nadležnost Bosne i Hercegovine u vezi finansiranja institucija i plaćanja međunarodnih obaveza BiH, a analogno tome se izvodi i nadležnost BiH po pitanju izmirenja obaveza po osnovu stare devizne štednje kao segmenta unutrašnjeg duga; te
- U članu IV 4. a) i e) prema kojem je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva Bosne i Hercegovine ili za vršenje funkcija Skupštine Bosne i Hercegovine po ovom Ustavu, odnosno Parlamentarna skupština Bosne i Hercegovine je nadležna za pitanja koja su potrebna da se provedu njene nadležnosti.

### **II - Razlozi za donošenje Zakona**

Razlozi za donošenje Zakona o dopunama Zakona o izmirenju obaveza po osnovu računa stare devizne štednje proizilaze iz Zaključka Privremene zajedničke komisije za utvrđivanje stare devizne štednje građana BiH položene na račune domicilnih banaka i filijala u BiH Parlamentarne skupštine BiH, donesenog na 2. sjednici, održanoj 19.03.2008. godine.

Naime, navedenim Zaključkom zatraženo je od Vijeća ministara BiH da, što je prije moguće, izradi Prijedlog izmjena i dopuna Zakona o izmirenju obaveza po osnovu računa stare devizne štednje, kojim bi se za verifikaciju stare devizne štednje utvrdio dodatni rok od dva mjeseca koji bi tekao od dana stupanja na snagu zakona, te da se Zakon uputi u parlamentarnu proceduru po hitnom postupku.

S tim u vezi, a u skladu sa odredbama člana 127. Poslovnika Predstavničkog doma Parlamentarne skupštine Bosne i Hercegovine («Službeni glasnik BiH», br. 33/06, 41/06, 81/06 i 91/07), predlaže se donošenje ovog Zakona po hitnom postupku, obzirom da specifičnost materije i neophodnost da se omogući naknadno verificiranje iznosa računa stare devizne štednje građanima koji to nisu uradili u prethodnom roku, a istovremeno, činjenica da se ne radi o složenom Zakonu opravdava zahtjev za usvajanje ovog Zakona po hitnom postupku.

### **III – OBRAZLOŽENJE PREDLOŽENIH PRAVNIH RJEŠENJA I NAČELA UREĐENJA ODNOSA**

#### **Član 1.**

Ovim članom predlaže se dodavanje novog dijela Zakona tako što se iza DIJELA TREĆEG – EMISIJA OBVEZNICA dodaje: DIO TREĆI A - NAKNADNA VERIFUKACIJA, u okviru kojeg se predlažu tri nova člana, tj. 23a, 23b. i 23c.

Naime, dodavanjem člana 23a. precizira se naknadni rok za verifikaciju, i to: u trajanju od dva mjeseca – za podnošenje zahtjeva za verifikaciju i pet mjeseci - za okončanje postupka od strane Agencija, računajući od dana stupanja na snagu ovog Zakona.

Istovremeno, a u svrhu što potpunije verifikacije, predlaže se da entiteti i Distrikt, u skladu sa dostignutim stepenom verifikacije, mogu propisivati nove dodatne rokove za podnošenje zahtjeva za verifikaciju u trajanju od najmanje dva mjeseca godišnje, s tim da postupak verifikacije mora završiti do 31.12.2010. godine.

Dodavanjem člana 23b. predviđa se gotovinska isplata u iznosu od 1.000 KM ili u visini razlike do 1.000 KM u odnosu na ranije isplate, kao i u ukupnom verificiranom iznosu potraživanja do 1.000 KM.

Član 23c. upućuje na izmirenje obaveza putem obveznica, tj. predlaže se da se naknadno verificirane obaveze, koje nisu izmirene u gotovini, izmiruju pod uslovima propisanim Zakonom, te da se obveznice emitiraju najkasnije do 31. marta naredne godine u odnosu na godinu u kojoj je izvršena verifikacija.

#### **Član 2.**

Ovim članom se predlaže dopuna člana 27. Zakona u smislu preciznije i jasnije odredbe u vezi izvršnih sudskih presuda koje se dostavljaju entitetskom ministarstvu finansija, odnosno Direkciji za finansije Brčko Distrikta, kao i mogućnost da takve presude mogu direktno dostavljati i povjerioci stare devizne štednje.

#### **Član 3.**

Ovaj član se odnosi na stupanje na snagu i objavljivanje u »Službenom glasniku BiH«.

*Istovremeno, ovaj Zakon se zasniva na načelima: zakonitosti, zaštite prava građana i efikasnosti sa ciljem da se u najvećoj mogućoj mjeri ispoštuje princip jednakosti građana i zaštite njihovih prava i osnovnih sloboda.*

#### **IV - PROCJENA FINASIJSKIH SREDSTAVA**

U skladu sa postojećim odredbama Zakona - izmirenje duga po osnovu računa stare devizne štednje ne pada na teret Budžeta institucija Bosne i Hercegovine i međunarodnih obaveza BiH, već na teret budžeta entiteta i Brčko Distrikta, a shodno izvršenoj verifikaciji, kao i alokaciji obaveza na entitete i Brčko Distrikt.

#### **V - KONSULTACIJE MEĐU INSTITUCIJAMA**

Tekst ovog Zakona usaglašen je na nivou nadležnih institucija entiteta i Brčko Distrikta, a obavljene su i druge potrebne konsultacije u svrhu pripreme odgovarajućih rješenja.